



KEMENTERIAN PENDIDIKAN TINGGI

SIARAN MEDIA

KARISMA MPP IPT 2025 BUKTIKAN KOMITMEN KPT MELAHIRKAN PEMIMPIN MADANI

Kepimpinan mahasiswa perlu dibentuk melalui karakter berintegriti, kemahiran komunikasi yang mantap serta keupayaan membuat keputusan berasaskan maklumat yang sahih.

Menteri Pendidikan Tinggi, YB Dato' Seri Diraja Dr. Zambry Abd Kadir menegaskan yang demikian ketika berinteraksi bersama pemimpin Majlis Perwakilan Pelajar (MPP) dalam sesi libat urus bersempena Program KARISMA MPP IPT 2025 di Akademi Kepimpinan Pendidikan Tinggi (AKEPT) siang tadi.

Beliau turut menekankan beberapa aspek utama yang perlu ada pada seorang pemimpin muda, antaranya kemahiran berkomunikasi dengan keyakinan, keupayaan membentuk pasukan yang efektif, serta sikap tanggungjawab dan kebertanggungjawaban terhadap keputusan yang dibuat.

Malah, beliau turut menyeru mahasiswa untuk memahami konsep "*Informed Decision*", iaitu membuat keputusan berasaskan fakta dan penilaian rasional, bukan dipengaruhi sentimen media sosial atau ledakan maklumat yang bersifat bias.

Dalam konteks pemerkasaan pendidikan, YB Menteri menegaskan keperluan membuka lebih banyak laluan akademik dari Politeknik dan Kolej Komuniti ke universiti, sejajar dengan usaha memperkasa institusi TVET sebagai sebahagian daripada sistem pendidikan tinggi negara.

Selain itu, beliau memberi perhatian terhadap isu kebajikan pelajar B40 melalui cadangan penggunaan geran khusus untuk memperkukuh inisiatif seperti Bank Makanan di IPT; penambahbaikan elaun latihan industri (LI) serta pelajar program Ijazah Sarjana Muda Pendidikan (ISMP).

Sesi libat urus tersebut sekali lagi membuktikan pendekatan keterbukaan Kementerian Pendidikan Tinggi dalam mendengar, memahami dan membimbing mahasiswa ke arah pembinaan kepimpinan Malaysia MADANI yang lebih progresif, berdaya saing dan berjati diri tinggi.

Program KARISMA MPP IPT 2025 yang berlangsung dari 25 hingga 28 April 2025 telah menghimpunkan 110 orang pemimpin mahasiswa dari Universiti Awam, IPTS, Politeknik dan Kolej Komuniti seluruh negara, melibatkan 19 Universiti Awam, 6 IPTS, 21 Politeknik dan 12 Kolej Komuniti.

Program permukiman yang dianjurkan oleh Jabatan Pendidikan Tinggi (JPT) dengan kerjasama Akademi Kepimpinan Pendidikan Tinggi (AKEPT) dan Akademi Kenegaraan (AK) tersebut mengetengahkan konsep latihan *hands-on*, *minds-on* dan *hearts-on* yang menekankan pembangunan karakter, integriti dan jaringan kepimpinan nasional dalam kalangan mahasiswa.

Kementerian Pendidikan Tinggi komited untuk terus melaksanakan program-program pembangunan bakat seperti KARISMA bagi memastikan negara memiliki barisan pelapis kepimpinan yang berkualiti tinggi dan sejajar dengan aspirasi Malaysia MADANI.

KEMENTERIAN PENDIDIKAN TINGGI

28 April 2025